

**ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ
ҚАРОРИ**

**АВТОМОБИЛЛАРНИ ГАЗ БИЛАН ТЎЛДИРИШ КОМПРЕССОР СТАНЦИЯЛАРИ
ВА АВТОМОБИЛЛАРГА ГАЗ ҚУЙИШ СТАНЦИЯЛАРИ ШОХОБЧАЛАРИНИ
РИВОЖЛАНТИРИШ ҲАМДА АВТОТРАНСПОРТ ВОСИТАЛАРИНИ
СУЮЛТИРИЛГАН ВА СИҚИЛГАН ГАЗГА ЎТКАЗИШ КОМПЛЕКС ЧОРА-
ТАДБИРЛАРИ ТЎҒРИСИДА**

Мустақиллик йилларида республикада ички бозорни ёқилғи-энергетика ресурслари билан таъминлаш чора-тадбирлари амалга оширилди. Нефть, газ ва газ конденсатини қайта ишлаш таъминланмоқда, суюлтирилган газ ишлаб чиқариш кўпаймоқда. Автотранспорт воситаларининг бир қисмини суюлтирилган ва сиқилган газга ўтказиш комплекс чора-тадбирлари амалга оширилди ҳамда уларга хизмат кўрсатиш бўйича кенг тармоқли инфратузилма ташкил этилди.

Иқтисодиётнинг ўсиши ва унга боғлиқ равишда автотранспорт воситалари сонининг кўпайиши автомобиль ёнилғисига, шу жумладан суюлтирилган ва сиқилган газга бўлган эҳтиёж ўсишига олиб келмоқда. Айни вақтда, суюлтирилган ва сиқилган газдан фойдаланиш ҳажмини тегишли равишда кўпайтириш, автомобилларни газ билан тўлдириш компрессор станцияларини ва автомобилларга газ қуйиш станциялари шохобчаларини ривожлантириш бўйича аниқ стратегия белгиланмаган.

Автотранспорт воситаларини экологик тоза ёнилғи турлари билан ўз вақтида таъминлаш, автомобиль бензинини улар билан алмаштириш, республиканинг транспорт инфратузилмасини янада ривожлантириш ва ушбу мақсадларда инвестицияларни жалб этиш мақсадида Вазирлар Маҳкамаси қарор қилади:

1. Республикада автомобиль бензини истеъмол қиладиган мавжуд автотранспорт воситалари тўғрисидаги ахборот 1-иловага* мувофиқ қабул қилинсин.

** 1-илова рус тилидаги матнда берилган.*

2. 2007—2012 йилларга мўлжалланган қуйидагилар:

Ўзбекистон Республикаси бўйича автомобиль воситаларининг суюлтирилган ва сиқилган газ истеъмоли прогноз ҳажмлари 2-иловага* мувофиқ;

автотранспорт воситаларини суюлтирилган газга ўтказишнинг прогноз кўрсаткичлари 3 ва 3а-иловаларга* мувофиқ;

автотранспорт воситаларини сиқилган табиий газга ўтказишнинг прогноз кўрсаткичлари 4 ва 4а-иловаларга* мувофиқ;

автомобилларни газ билан тўлдириш компрессор станциялари куриш прогнози 5-иловага* мувофиқ;

автомобилларга газ қуйиш станциялари куриш прогнози 6-иловага* мувофиқ;

автомобиль газ баллонлари ва суюлтирилган газни сақлаш учун идишлар ишлаб чиқариш прогнози 7-иловага* мувофиқ;

автомобилларни газ билан тўлдириш компрессор станциялари ва автомобилларга газ қуйиш станцияларини самарали лойиҳалаштириш, куриш ва улардан фойдаланиш учун ишлаб чиқиладиган ва қайта кўриб чиқиладиган зарур норматив ҳужжатлар рўйхати 8-иловага* мувофиқ маъқуллансин.

** 2 — 8-иловалар рус тилидаги матнда берилган.*

3. Ўзбекистон Республикаси Иқтисодиёт вазирлиги «Ўзбекнефтгаз» миллий холдинг компанияси билан биргаликда 7-иловага* мувофиқ автомобиль газ баллонлари ва суюлтирилган газни сақлаш учун идишлар ишлаб чиқариш лойиҳаларини прогнозга биноан Маҳаллийлаштириш дастурига киритишни назарда тутсин.

Олдинги таҳрирга қаранг.

4. Белгилансинки, автомобилларни газ билан тўлдириш компрессор станциялари ва автомобилларга газ қуйиш станциялари объектлари куриш учун ер участкалари ажратиш

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан тасдиқланган схемага қатъий мувофиқ равишда ҳамда Давлат архитектура ва қурилиш қўмитаси, Ўзбекистон автомобиль ва дарё транспорти агентлиги ва Ўзбекистон Республикаси Ички ишлар вазирлигининг Давлат ёнғин хавфсизлиги хизмати ҳудудий бўлинмалари билан келишган ҳолда тендер асосида амалга оширилади.

(4-банд Ўзбекистон Республикаси Вазирлар Маҳкамасининг 2014 йил 17 июлдаги 196-сонли қарори таҳририда — ЎР ҚХТ, 2014 й., 31-сон, 380-модда)

5. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари Ўзбекистон автомобиль ва дарё транспорти агентлиги билан биргаликда бир ой муддатда Ўзбекистон Республикаси Иқтисодиёт вазирлигига автомобилларни газ билан тўлдириш компрессор станциялари ва автомобилларга газ қуйиш станцияларини халқаро ва вилоятлараро автомобиль йўллари бўйлаб мақбул жойлаштиришнинг лойиҳа схемаларини киритсинлар.

6. «Ўзбекнефтгаз» миллий холдинг компанияси «Ўздавнефтгазинспекция», Ўзбекистон автомобиль ва дарё транспорти агентлиги, манфаатдор вазирликлар ва идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари билан биргаликда икки ой муддатда мазкур қарорга 3, 3а, 4 ва 4а-иловаларга мувофиқ прогноз параметрлар бажарилиши бўйича чора-тадбирларни ишлаб чиқсин ва тасдиқлаш учун Ёқилғи-энергетика ресурсларини тежаш комиссиясига киритсин.

7. Ўзбекистон Республикаси Ички ишлар вазирлиги сиқилган ва суюлтирилган газдан фойдаланиш учун қайта жиҳозланган автотранспорт воситалари конструкциясининг лойиҳа ҳужжатларига ва йўл ҳаракати хавфсизлиги талабларига мувофиқлиги устидан қаттиқ назорат ўрнатсин.

8. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Э.Р.Шоисматов зиммасига юклансин.

Ўзбекистон Республикасининг Бош вазири Ш.Мирзиёев

Тошкент ш.,
2007 йил 10 февраль,
30-сон

(Ўзбекистон Республикаси қонун ҳужжатлари тўплами, 2007 й., 7-8-сон, 64-модда; 2010 й., 51-сон, 486-модда; 2014 й., 31-сон, 380-модда)